

T.3159/5932.83

13

直隸秦州新志卷之十二 上

雜記

記卽志也旣志矣又何記曰雜也雜則可勿志然不可不記也何以謂之雜駁而不純也如色然純乎青者謂之青純乎黃者謂之黃純乎赤白黑者謂之赤白黑如味然純乎甘純乎酸鹹純乎辛苦者謂之甘酸辛苦鹹如聲然純乎宮徵商羽角者無論矣其有不純則雜也然聲不雜不能以成樂色不雜不能以成章味不雜不能以適口故曰物

哈佛大學漢和
圖書館珍藏印

相雜謂之文然則雜可不記乎今之記者何雜也
蓋記之名倣於史左史記言右史記動也夫史兼
褒貶而志惟揚善故雜記之類諸志闕焉今若就
志以爲志則雜誠可勿記顧此志非惟錄夫志蓋
多取之史者史有其事雖雜可勿記耶且善可勸
惡亦可懲也必兼二者而義始備惟是其人其事
欲以附於所部之列則弗倫故雜而記之云爾志
雜記第十二嘗考歷史惟晉書有載記以載竊據
諸雄獨李暠附列傳之末者原其心彼固取之涼

未嘗攘之晉也且晉書成於唐文皇之手唐固其
苗裔也然且用以殿一代諸臣其去載記一間耳
豈義有所弗忍亦有所不敢歟茲則無分軒輊而
統謂之假號卽以爲雜記之首云次僞官從其類
也繼之以不臣懲跋扈惡姦邪也次酷吏異循良
也而貪墨者附焉其害民若同惡相濟也若佞人
之宜遠與宦者之不可假以官直書而義見史氏
之舊文也至於西戎氏羌世爲邊患雖其事概見
武備中然或有一姓而綿歷數朝者歷叙之興衰

可覩也乃若仙釋者流游於方之外則亦以方外待之不叅正傳也曰幻異近仙釋家言也曰叢談雜記之涯歸也客有問予者曰叢與雜異乎曰無異談與記異乎曰異曷異爾記者統其類談者舉其餘也部所不能列者而記該之類所不能分者而談舉之耳夫既談則無妨錯出其事與互見其詞故視他轉詳焉非詳於雜而略於正也正者爲體例之所拘雜則非多端不備也客曰唯遂書以弁之

假號

漢

隗囂字季孟天水成紀人少仕州郡王莽國師劉歆引囂爲士歆死囂歸鄉里季父崔素豪俠能得衆聞更始立而莽兵連敗乃與兄義及上邽人楊廣冀人周宗謀起兵應漢謂囂素有名好經書遂共推爲上將軍囂以平陵人方望爲軍師用其言立高祖太宗世宗廟稱臣奉祀移檄郡國數莽不道稱漢復元年勒兵十萬擊殺雍州牧陳慶攻安定大尹王向降其

衆狗隴西武都金城武威張掖酒泉敦煌皆下之更始二年遣使徵囂至長安以爲右將軍崔義欲叛歸囂懼禍以告更始誅之以囂爲御史大夫明年光武卽位河北囂說更始歸政光武不聽與諸將謀劫更始事覺亡歸天水復據故地自稱西州上將軍更始敗三輔士大夫皆歸囂囂謙恭愛士傾身接引名震西州建武二年鄧禹擊赤眉裨將馮愔叛禹向天水囂擊破之禹承制以囂爲西州大將軍赤眉欲上隴囂又擊敗之乃上書詣闕光武報以殊禮言稱字用

敵國之儀所以慰藉之良厚囂復遣兵佐馮異擊走呂鮪遣使上狀帝報以手書恩禮愈篤時關中將帥數上書言蜀可擊帝以示囂因使討蜀以効其信囂不行初囂與來歙馬援相善帝數使歙援勸令入朝乃遣長子恂隨歙詣闕封鑄羌侯而囂將王元說之曰天水完富士馬最強北收西河上郡東收三輔案秦舊迹表裏山河元請以一丸泥爲大王東封函谷關圖王不成其弊猶足以霸囂心然元計於是游士長者稍稍去之帝積苦兵間以囂子內侍公孫述遠

據邊陲乃謂諸將曰且當置此兩子於度外耳會公孫述遣兵寇南郡乃詔囂當從天水伐蜀因此欲以潰其心腹囂上言白水險阻棧閣絕敗又多設支閼帝知其終不爲用叵欲討之遂西幸長安遣耿弇等七將軍從隴道伐蜀先使來歙奉璽書喻旨囂疑懼使王元據隴坻侵三輔馮異等擊破之囂乃上書謝有司以囂言慢請誅其子帝不忍復使來歙至汧賜囂書囂知帝審其詐遂稱臣於公孫述述以囂爲朔寧王遣兵往來爲之授執帝因令來歙以書招王遵

遵與家屬詣京師帝乃率諸將西征之數道上隴使王遵持節監吳漢留屯於長安遵以書喻牛邯歸命洛陽於是囂大將十三人屬縣十六衆十餘萬皆降王元入蜀求救囂將妻子奔西城從楊廣而田弇李育保上邽詔告之終不降於是誅其子恂使吳漢岑彭圍西城耿弇蓋延圍上邽車駕東歸數月王元等將蜀救兵五千餘人卒至決圍殊死戰遂得入城迎囂歸冀於是安定北地天水隴西復反爲囂九年春囂病且餓出城餐糗糲恚憤而死王元周宗立囂少

子純為王明年來歛取奔蓋延等攻破落門純降舊志

又有盧芳假名劉文伯煽誘羌胡為亂後降漢復叛入匈奴死史稱芳安定三水人今削不載

晉

南陽王司馬保字景度少有文義好述作父模永嘉初都督秦雍梁益諸軍事代河間王顥鎮關中立保世子表為西中郎將東羌校尉鎮上邽秦州刺史裴苞距之模遣將攻却苞安定太守賈疋以郡迎苞模又使擊走疋會劉聰使其子榮攻長安模兵敗遇害保在上邽得立賈疋死裴苞為張軌所殺保全有秦

州之地自號大司馬承制置百官隴右氏羌並從之涼州刺史張實遣使貢獻及愍帝即位以保為右丞相都督陝西諸軍事愍帝之蒙塵也保自稱晉王時上邽大饑士衆窘困保將張春奉保之南安復奔桑城將投於張實實使兵迎保實禦之也是歲薨年二十七保體質豐偉嘗自稱重八百斤無子張春立司馬瞻奉保後陳安攻春瞻降于安送劉曜殺之安奉保喪以天子禮葬於上邽謚曰元陳安隴人初為南陽王司馬模帳下都尉模使之率

衆攻裴苞苞奔安定模之敗也安歸于保保命統精
勇千餘人以討羗寵遇甚厚保將張春等秦安有異
志請除之保不許乃伏刺客以刺安安被創馳還隴
城遣使詣保貢獻不絕及保奔南安安自號秦州刺
史稱藩于劉曜請朝曜以疾辭安意其死也遂大掠
而歸獲曜將呼延實及長史魯憑安囚實而謂之曰
劉曜已死孤當與足下終定大業實叱安曰狗輩汝
前背司馬保今復如此不久梟首上邽通衢何謂大
業安怒殺之西州氏羗悉從安安士馬雄盛衆十餘

萬自稱涼王魯憑對安大哭曰吾不忍見陳安之死
也安又殺之曜聞憑死嘆曰賢人者天下之望也安
於招賢採哲之秋而害君子絕時望吾知其無能爲
也太寧元年曜親征圍安于隴城安留楊伯支姜冲
兒等守隴帥騎數百突圍而出欲南走陝中曜使其
將平先追之與鬪於陝中安左手奮七尺大刀右手
執丈八蛇矛近交則刀矛俱發輒害五六遠則雙帶
韃服左右馳射而走平先亦勇捷如飛與安搏戰三
交奪其蛇矛而退日暮雨甚安棄馬與五六人步踰

山嶺匿於溪澗會連雨始霽輔威呼延清尋其徑迹
斬安于澗曲楊伯支斬姜冲兒以隴城降宋亭斬趙
募以上邽降徙秦州大姓楊姜諸族二千餘戶于長
安氏羌悉下

楊茂搜本姓令狐楊駒之甥略陽清水氏人也初楊
駒始居仇池有地百頃其孫千萬附魏封爲百頃王
千萬孫飛龍寢盛徙居略陽以其甥令狐茂搜爲子
茂搜避齊萬年之亂率部落還保仇池自號輔國將
軍右賢王關中人避亂者多依之尋卒子難敵遂據

其地建興元年寇陷梁州二年爲張威所逐降于李
成永昌元年劉曜親征氏羌難敵率衆距逐降于李
保仇池仇池諸氏羌多降于曜曜又進攻仇池屬病
甚議欲班師恐難敵躡其後乃使人說難敵難敵遣
使稱藩曜大悅以難敵爲上大將軍武都王尋稱仇
池王及陳安敗難敵內懷疑懼奔于漢中曜以田崧
爲益州刺史鎮仇池難敵自漢中還襲仇池剋之執
田崧立之於前叱令拜崧顧排一人取其劍前刺難
敵不中爲難敵所殺難敵遂復據仇池後卒子毅嗣

遣使稱藩于晉咸康二年楊初殺毅降趙永和三年
 初遣使稱藩于晉晉以初為雍州刺史仇池公卒楊
 世嗣晉以為秦州刺史世卒楊纂立咸安元年苻秦
 伐仇池克之執楊纂以歸楊氏詳後羌戎茲載茂搜從省志也
 苻洪字廣世略陽臨渭氏人也其先蓋有扈之苗裔
 世為西戎酋長始其家池中蒲生長五丈五節如行
 形時咸謂之蒲家因以為氏焉父懷歸部落小帥先
 是隴右大雨百姓苦之謠曰雨若不止洪水必起故
 因名曰洪好施多權略驍武善騎射屬永嘉之亂乃

散千金名英傑之士訪安危變通之術宗人蒲光蒲
 突遂推洪為盟主劉曜僭號長安光等逼洪歸曜拜
 率義侯曜敗洪西保隴山石虎將攻上邽洪又請降
 虎大悅拜冠軍將軍委以西方之事虎死洪有衆十
 餘萬遣使降晉穆帝以為征北大將軍時有說洪稱
 尊號者洪亦以讖文有草付應王又其孫堅背有艸
 付字遂改姓苻氏自稱大將軍大單于三秦王洪謂
 博士胡文曰孤率衆十萬居形勝之地冉閔慕容儁
 可指辰而殄姚襄父子克之在吾數中孤取天下有

易於漢祖初石虎以麻秋鎮枹罕冉閔之亂秋歸鄴
洪使子雄擊而獲之以秋爲軍師將軍秋說洪西都
長安洪深然之旣而秋因宴鴆洪將并其衆世子健
收而斬之洪將死謂健曰所以未入關者言中州可
指時而定今見困豎子中原非汝兄弟所能辦關中
形勝吾亡後便可鼓行而西言終而死年六十六健
僭位僞謚惠武帝

苻健字建業洪第三子也初母羌氏夢大羆而孕之
及長勇果便弓馬好施善事人洪死健嗣位旣而自
稱晉征西大將軍盡衆西行遂克長安僭稱天王大
單于明年僭稱帝後置來賓館於平朔門以懷遠人
起靈臺於杜門與百姓約法三章薄賦卑宮垂心政
事優禮耆老修尙儒學而關右稱來蘇焉健立四年
死子生立無道苻堅弒而代之

苻堅字永固一名文玉健弟雄之子也初洪從石虎
徙鄴家於永貴里其母苟氏嘗游漳水祈子於西門
豹祠其夜夢與神交因而有孕十二月而生堅焉有
神光自天燭其庭背有赤文隱起成字曰艸付臣又

土王咸陽臂垂過膝目有紫光洪竒而愛之名曰堅頭年七歲聰敏好施舉止不踰規矩每侍洪側輒量洪舉措取與不失機侯洪每曰此兒姿貌瓌偉質性過人非常相也高平徐統有知人之鑒遇堅於路下車屏人密謂之曰苻郎骨相不恒後當大貴比長博學多才藝有經濟大志要結英豪以晉緯世之宜既代生僭稱大秦天王以王猛爲侍中中書令京兆尹其特進強德健妻之弟也昏酒豪橫爲百姓之患猛捕而殺之陳尸於市其中丞鄧羌性鯁直不撓與猛

協規齊志數旬之間貴戚強豪誅死者二十有餘人於是百寮震肅豪右屏氣路不拾遺風化大行堅歎曰吾今始知天下之有法也天子之爲尊也於是遣使巡察四方及戎夷種落州郡有高年孤寡不能自存長史刑罰失中爲百姓所苦清修疾惡勸課農桑有便於俗篤學至孝義烈力田者皆令具條以聞僭位五年鳳皇集於東闕堅廣修學宮召郡國學生通一經以上充之公卿已下子孫並遣受業其有學爲通儒才堪幹事清修廉直孝悌力田者皆旌表之於

是人思勸勵號稱多士盜賊止息請託路絕田疇修
闢帑藏充盈典章法物靡不悉備堅親臨太學考學
生經義優劣品而第之問難五經博士多不能對自
是每月一臨太學諸生競勸焉已而滅燕取蜀漢破
仇池降楊纂破涼州降張天錫念更取江南便一統
銳意伐晉子弟羣臣皆諫不可惟姚萇慕容垂勸之
已伐晉敗歸慕容垂請撫東方遂叛慕容冲反攻入
阿房姚萇叛於北地堅出避兵五將山爲姚萇弑於
新平佛寺

苻登字文高堅族孫也少有壯氣不修細行長而折
節謹原頗覽書傳苻堅時毛興鎮上邽請以爲司馬
登度量不羣好爲奇略興內服焉然敬憚而不能委
任姚萇作亂遣其弟碩德率衆伐毛興相持久之興
將死衆推衛平已又以平年老推登代之遂專統征
伐是時歲旱衆饑道殣相望登每戰殺賊名爲熟食
謂軍人曰汝等朝戰暮便飽肉何憂於饑士衆從之
噉死人肉輒飽健能鬪姚萇聞之急召碩德曰汝不
來必爲苻登所食盡碩德於是下隴奔萇已聞苻丕

死登於是僭卽帝位立堅神主於軍中載以輜輶羽葆青蓋車建黃旗武賁之士三百人以衛之繕甲纂兵將引帥而東乃告堅神主曰昔五將之難賊羗肆害于聖躬實登之罪也今合義旅衆餘五萬精甲勁兵足以立功年穀豐穰足以資贍卽日星言電邁直造賊庭奮不顧命隕越爲期因歔歔涕涕將士莫不悲慟皆刻鉞鎧爲死休字示皆以戰死爲志每戰以長稍鉤刃爲方圓大陣知有厚薄從中分配故人自爲戰所向無前八九年間凡百十戰互有勝負後姚

萇死復與萇子興再戰兵敗爲興所殺

胡可泉曰諸苻可稱者不

獨此數人若健世子苻萇若揚武將軍苻菁若右衛將軍苻雅若豫州牧苻暉皆以武略著名當時使秦居中州能以服事晉則諸苻未必非亂臣也

李特字元休略陽氏也少仕州郡見異當時身長八

尺雄武善騎射沉毅有大度元康中氏齊萬年反關

西擾亂頗歲大饑百姓乃流移就穀相與入漢川者

數萬家特隨流人將入於蜀至劍閣箕踞太息顧眄

險阻曰劉禪有如此之地而面縛於人豈非庸才邪

已而入蜀永康初益州刺史趙廞反特弟庠等歸之

厥忌庠威名害之特攻殺厥遂有雉據巴蜀之意朝廷以討厥功拜特宜威將軍會刺史羅尚等急督流人北歸流人相與詣特特結大營以處之尚等襲特營特敗之遂自請依竇融故事行鎮北大將軍傳其子孫僭號據蜀凡四十餘年

按特爲廩君苗裔而魏武遷其祖於略陽則亦

略陽氏也秦安志多載苻氏而獨不及特今略爲補著之又仇池氏楊氏南齊書謂其與苻氏同出略陽亦宜著之而魏書謂其世居岐隴以南漢川以西在武都郡又非略陽也故從略舊志又有閭式言式天水人考式事在特傳特是略陽氏未言式是天水人也謹從闕疑

李雄字仲儁特第三子也母羅氏夢大蛇繞身孕十

四月而生少以烈氣聞有術士每謂人曰關隴之士皆當南移李氏子中惟仲儁有奇表終爲人主特承制以爲前將軍後雖據蜀僭號嘗與涼州張駿共尊晉室凡立王十年性寬厚簡約刑法甚有名稱

呂光字世明生之夜有神光因名目重瞳肘有肉印十歲遊戲畫爲戰陣諸兒咸推爲主部分之光沉毅凝重寬簡有大量喜怒不形於色王猛見而異之曰此非常人舉賢良除美陽令夷夏愛服遷鷹揚將軍從王猛征討威名大著遷步兵校尉苻堅授先使持

節都督帥衆七萬以討西域所經諸國無不降附光
至龜茲王帛純拒之光左臂脉起成文曰巨霸營外
夜有黑龍之祥光喜進攻龜茲城西域諸胡救者七
十餘萬人皆便弓馬善矛銷鎧如連鑠射不可入光
乃結爲勾鑠之陣戰於城西大破之帛純逃去王侯
降者十餘國光入其城諸胡貢款屬路光撫寧西域
威恩甚著龜茲旣平光有留志鳩摩羅什勸之東還
光至姑臧涼州刺史梁熙拒光光執而殺之因自署
護羌校尉涼州刺史聞苻堅被害光奮怒哀號三軍
皆縞素乃自稱使持節大都督大將軍涼州牧酒泉
公時麟見金澤縣光以爲瑞乃僭稱三河王建號麟
嘉遣使朝貢署官自丞郎已下皇始初僭稱天王置
百官是爲後涼

李暠字元盛小字長生隴西成紀人漢前將軍廣之
十六世孫也高祖雍曾祖柔仕晉竝歷位郡守祖弇
仕張軌爲武衛將軍安世亭侯父昶幼有令名早卒
遺腹生暠少而好學性沉敏寬和美器度通涉經史
尤善文義及長頗習武藝誦孫吳兵法嘗與呂光太

史令郭鑿及其同母弟宋繇同宿磨起謂繇曰君當位極人臣李君有國士之分家有騮草馬生白額駒此其時也呂光末京兆段業自稱涼州牧以敦煌太守趙郡孟敏爲沙州刺史署暲效穀令敏尋卒敦煌護軍馮翊郭謙沙州治中敦煌索僊等以暲溫毅有惠政推爲寧朔將軍敦煌太守是初難之會宋繇仕於業告歸敦煌言於暲曰兄忘郭鑿之言邪白額駒今已生矣暲乃從之尋進號冠軍稱藩于業業以暲爲安西將軍敦煌太守領護西胡校尉及業僭稱涼

王分敦煌之涼興烏澤晉昌之宜禾三縣爲涼興郡進暲持節都督涼興已西諸軍事鎮西將軍領護西夷校尉時有赤氣起於暲後園龍跡見於小域隆安四年晉昌太守唐瑤移檄六郡推暲爲大郡督大將軍涼公領秦涼二州牧護羌校尉暲乃赦其境內建年爲庚子追尊祖父母建置官僚設武威太守等官以招懷東夏又遣宋繇東伐涼興并擊玉門已西諸城皆下之遂屯玉門陽關廣田積穀爲東伐之資仍於南門外臨水起堂名曰靖恭之堂以議朝政閱武

事圖讚自古聖帝明皇忠臣孝子烈士貞女曷親爲
序頌以明鑒戒之義當時文武羣寮亦皆圖焉又立
泮宮增高門學生五百人起嘉納堂於後園以圖讚
所志義熙元年曷改元爲建初遣舍人黃始梁興間
行奉表詣闕已而漸圖東征遷都酒泉作手令戒其
諸子親率騎二萬略地至於建東鄯善前部王遣使
貢其方物且渠蒙遜來侵至於建康掠三千餘戶而
歸曷大怒率騎追之及於彌安大敗之盡收所掠之
戶以前表未報復使沙門間行奉表曷初爲羣雄所

奉遂啟霸圖兵無血刃坐定千里意謂河西十郡歲
月可一旣而禿髮傉檀入據姑臧且渠蒙遜基宇稍
廣於是慨然著述志賦旋臥疾薨謚武昭子歆嗣累
敗蒙遜兵朝廷拜歆鎮西大將軍後爲蒙遜所滅歆
弟讓自曷在時假定朔將軍燉煌太守弟恂皆爲敦
煌太守有惠政歆之敗棄郡而奔曷故將逐蒙遜所
置密信招恂推爲冠軍將軍涼州刺史蒙遜遣世子
德政率衆攻恂恂閉門不戰蒙遜自率衆二萬攻之
三面起堤以水灌城恂遣壯士一千連版爲橋潛欲

决堤蒙遜勒兵逆戰屠其城次子翻翻子寶入元魏
歷世有名蹟

乞伏國仁隴西鮮卑人其先如弗自漠北南出五代
祖祐隣弁兼諸部部衆漸盛父司繁擁部落降于苻
堅堅以爲南單于鎮勇士川甚有威惠司繁卒國仁
代鎮堅伐司馬昌明以國仁爲前將軍國仁叔步頽
叛於隴西堅遣國仁還討之步頽大悅迎國仁于路
國仁曰苻氏妄竊名號窮兵極武違天怒人將何以
濟且物極則虧禍盈而覆者天之道也是役也難以

免矣當與諸君共成一方之業及堅敗乃招集諸部
衆十餘萬太元十年自稱大都督大將軍秦河二州
牧號年建義署置官屬分部內爲漢陽天水略陽等
十二郡築勇士城以居之苻登立以國仁爲大單于
苑川王在位四年僞謚宣烈

乾歸國仁弟雄武英傑沉雅有度量國仁死子公府
幼衆推乾歸爲河南王改元太初遷于金城聲振邊
服休官吐谷渾諸部並率衆降隴西太守越質詰歸
以平襄叛亦擁衆降之隆安四年所居南景門崩惡

之遂遷於苑川姚興將姚碩德率衆伐之興潛師繼發爲興所敗乃奔允吾復奔長安興以爲河州刺史入朝留之子熾磐起兵叛秦乾歸聞之自秦逃歸命熾磐鎮苑川自率衆遷于度堅山稱秦王改元更始義熙六年復都苑川攻秦略陽南安隴西皆克之後又徙譚郊爲兄子公府所殺立二十四年熾磐乾歸長子勇略過人殺公府而自立改元永康尋稱秦王置百官又改年建洪在位七年而宋氏受禪以宋元嘉四年死子慕末立

慕末熾磐第二子嗣僞位改年永洪政刑酷濫部民怨之後爲赫連定所逼請迎於元魏魏許以安定以西平涼以東封之慕末乃焚城邑毀寶器率衆至南安爲赫連定所困遂率宗族五百餘人降送於上邽元魏

莫折念生秦州城人其父太提於正光五年六月據城反自稱秦王殺刺史李彥詔南秦州城人張長命韓祖香孫掩殺刺史崔遊以應之太提遣城人卜朝襲殺高平鎮將赫連略行臺高元榮太提尋死念生

代立僭稱天子號年天建置立百官遣其都督樊元
張朗楊伯年等攻仇鳩河池二戍東益州刺史魏子
建遣將擊之斬樊元念生遣其兄高陽王莫折天生
下隴東寇復遣都督竇雙攻盤頭郡魏子建斬之天
生攻陷岐州高平人殺卜朝魏子建招降南秦氏民
復六郡十二戍斬韓祖香而張長命降於蕭寶寅念
生遣兵攻涼州城人復應之明年蕭寶寅大破秦賊
於黑水天生退走入隴西而涇及隴東悉平念生又
遣楊鮮梁下辯姜齊等攻仇池郡子建擊斬下辯齊
念生更遣杜光攻仇池子建復斬之天生請降蕭寶
寅使行臺左丞崔士和入據秦州天生復叛送士和
於胡琛殺之胡琛以天水人呂伯度爲大都督秦王
資其士馬還征秦州大敗念生將杜粲於成紀遂至
顯親念生率衆身自拒戰又大敗朝廷授伯度涇州
刺史平秦郡公孝昌二年九月念生爲其將常山王
杜粲所殺合門皆盡粲據州降于蕭寶寅

唐

薛舉蘭州金城人武敢善射好結納邊豪爲雄長隋

大業末任金城府校尉會歲凶隴西起金城令郝
瑗將討賊募兵數千檄舉將始授甲大會置酒舉與
子仁杲及其黨劫瑗于坐矯稱捕反者卽起兵囚郡
縣官發粟以賑貧乏自號西秦霸王建元秦興更招
附餘盜剽馬牧兵鋒銳甚所過皆下不闕旬盡有隴
西地僭帝號于蘭州使仁杲克秦州徙都之軍益張
號二十萬將窺京師會高祖入關遂留攻扶風秦王
擊破之逐北至隴還舉遂踰隴走武德元年掠岐豳
秦王禦之次高塘度舉糧少利速鬪堅壁老其兵行

軍長史劉文靜殷開山觀兵於高塘恃衆不設備舉
掩其後遂大敗死者十六王還京師舉拔高塘將乘
勝直趨長安方行而病召巫占視言唐兵爲祟舉惡
之未幾死仁杲代立僞謚武皇帝未葬而仁杲滅
仁杲多力善騎射軍中號萬人敵性賊悍初舉每破
陣軍獲俘仁杲必斷舌刈鼻或春斫之嘗得虜信子
立怒其不降磔之火漸割以啖士拔秦州取富人倒
懸以酢注鼻或杙其隱以求財雖舉殘猛亦惡之每
戒曰汝材略足辦事而傷於虐終覆吾宗及繼立與

諸將素有隙者咸猜懼繇是兵稍衰秦王率諸將復壁高塘諸將請戰王曰我軍新銳銳氣少賊驟勝而驕有輕我心我閉壁以折之伺衰而擊可一戰禽也因令軍中曰敢言戰者斬仁杲糧乏挑戰不許其將牟君才等以衆降鍾俱仇以河州降王策賊可破遣將軍龐玉擊宗羅暎於淺水原戰酣玉以勁兵擣其背羅暎敗王率騎追奔於是悉軍馳之曰勢破竹不可失也夜半至析塘遲明圍合仁杲率僞官屬降

五代

李茂貞博野人本姓宋名文通爲博野軍卒戍鳳翔黃巢犯京師鄭畋以博野軍擊賊茂貞以功自隊長遷軍校敗叛將王行瑜於大唐峯僖宗賜以姓名拜鳳翔隴右節度使大順元年封隴西郡王自請爲山南招討使擅發兵攻破興元殺楊復恭父子徙山南西道節度使詔以他將鎮鳳翔不奉詔上表不遜昭宗怒使宰相杜讓能治兵而以覃王率扈駕軍討之戰敗茂貞遂犯京師帝爲殺兩樞密及讓能以謝之乃罷兵明年有所請帝不許復率鎮兵犯京師謀廢

昭宗未果而晉王李克用亦舉兵茂貞懼乃殺宰相
韋昭度李碶留其養子繼鵬以兵二千宿衛而去晉
兵至河中繼鵬劫昭宗出奔茂貞以兵至鄆縣斬繼
鵬自贖乃詔罷歸後復犯京師昭宗遣罕王拒之不
克乃加拜茂貞尚書令封岐王其後昭宗爲宦者所
廢旣反正宰相崔胤欲借梁兵誅諸宦茂貞遣其子
繼筠以兵數千宿衛京師宦者恃岐兵益驕不可制
梁軍至同州繼筠劫昭宗幸鳳翔梁軍圍之逾年城
中困憊已極天復三年茂貞與梁和圍解天子雖得

出然梁遂劫東遷而唐亡茂貞亦自困矣及梁太祖
卽位諸侯之彊者皆相次稱帝獨茂貞不能但開府
置官屬以妻爲皇后鳴梢羽扇視朝出入擬天子而
已茂貞初破楊守亮取興元而邠寧鄜坊皆附之有
地二十州其被梁圍也興元入于蜀開平已後邠寧
鄜坊入于梁秦鳳階成又入于蜀當梁末年所有僅
七州而已唐莊宗破梁改封茂貞秦王卒

王建字光圖舞陽人少無賴以屠牛盜驢販私鹽爲
事里人謂之賊王八後爲軍卒遷隊將復爲都頭迎

僖宗於蜀田令孜以爲養子出爲壁州刺史建乃招集亡命有衆八千攻克閬州利州或患之令孜曰王八吾兒也以一介召之可置麾下建喜曰十軍阿父召我我至成都求一鎮文德元年分邛蜀黎雅爲永平軍拜建節度使建計逐西川節度韋昭度留其符節卽以兵扼劍門兩川由是阻絕引兵攻成都而諸州皆殺刺史降遂入成都殺令孜唐以建爲成都尹復以攻伐并有兩川之地是時李茂貞兼據梁洋秦隴爲梁所圍建襲取其地於是并有山南西道攻下

夔施忠萬四州唐封建蜀王又取歸州遂并有三峽梁滅唐卽自稱尊號封其諸子爲王以韋莊爲左相李茂貞與建婚求山南故地建怒自將擊之後又攻岐取其秦鳳階成四州屢改元卒年七十二子衍嗣所爲滯亂唐莊宗遣將至成都衍降召衍入洛陽率其宗族僞官等數千人以東行至秦川驛莊宗用伶人景進計遣宦者向延嗣誅其族

孟知祥邢州人父道事晉王晉王以其弟克讓女妻知祥莊宗建號以知祥爲太原尹旣破蜀卽以之爲

成都尹莊宗崩知祥乃訓練兵甲陰有王蜀之志表請罷還唐所遣節度刺史等長興元年九月應聖節知祥開宴東北望再拜俯伏嗚咽泣下沾襟士卒皆爲之獻歔明日遂舉兵反并有東川脅朝廷封之爲蜀王明宗崩乃卽尊位國號蜀子昶立復取秦成階鳳併有王行故地昶好打球走馬又爲方士房中之術多採良家子以充後官韓保貞諫昶大悟卽日出之昶將相大臣皆知祥故人知祥寬厚多優縱之及其事昶益驕蹇多踰法度而李仁罕尤甚昶殺仁罕

衆乃懼周世宗伐蜀取秦成階鳳昶懼遣使者聘于南唐東漢以張形勢遷延入宋私約束漢將撓中國太祖遂詔伐蜀遣王全斌等分道攻之至夔州守將高彥儔閉城拒守判官羅濟勸其走彥儔曰吾昔不能守秦川今又奔北何面目見蜀人乎乃自焚而死蜀兵所在奔潰昶問計于左右或言堅守昶歎曰吾與先君以溫衣美食養士四十年一旦臨敵不能爲吾東向放一箭雖欲堅壁誰與吾守者耶乃命李昊草表以降初昊事王行爲草降表至是又草焉蜀人

正氣秦州新志 卷之三
夜表其門曰世修降表李家當時傳以爲笑昶至京
師封秦國公卒贈楚王

偽官

漢 王莽末年

原涉字巨先祖父武帝時以豪傑徙茂陵涉父哀帝時爲南陽太守死涉讓還南陽賻送行喪冢廬三年繇是顯名舉能治劇爲谷口令時年二十餘谷口聞其名不言而治若半歲自劾去官報仇亡命逢救出迺大治起冢舍周閣重門初武帝時京兆尹曹氏葬茂陵民謂其道爲京兆阡涉慕之迺買地開道立表署曰南陽阡人不肯從謂之原氏阡涉上冢單車毆

上茂陵遣奴至市買肉奴與屠爭言斫傷屠者亡是時茂陵守令尹公新視事涉未謁也聞之大怒遣兩吏脅守涉奴不出吏欲便殺涉去涉迫窘肉袒自縛箭貫耳詣廷門謝臯尹公許之或言君以守令辱原涉如是一旦真令至君復單車歸爲府吏可爲寒心莫若墮壞涉冢舍條奏其舊惡尹公如其計果遂得真令王莽末東方兵起諸王子弟多薦涉能得死士可用莽迺召見責以臯惡赦賞拜鎮戎大尹天水太守涉至官無幾長安敗郡縣諸假號起兵素聞涉名拜謁之傳送致涉長安更始西屏將軍申徒建請涉與相見大重之故茂陵令尹公爲建主簿涉從建所出尹公故遮拜涉怒使客刺殺主簿涉自詣謝申徒建遣兵道徼取涉於車上遂斬涉懸之長安市

公孫述字子陽茂陵人也哀帝時以父任爲郎後父仁爲河南都尉而述補清水長仁以述年少遣門下掾隨之官月餘掾辭歸白仁曰述非待教者也後太守以其能使兼攝五縣政事修理姦盜不發郡中謂有鬼神王莽天鳳中爲遵江卒正居臨邛復有能名

直隸秦州新志 卷之三
及更始立豪傑各起其縣以應漢述名縣中豪傑謂
欲保郡自守以待真主豪傑從之遂據有成都威震
益部等自稱天子號成家後爲漢兵所刺洞胷墮馬
而死吳漢破其城夷述妻子盡滅公孫氏
按述亦僭
竊據者則非此地又嘗爲王莽官故也
今以入僞官者因其曾官於此而其所
竊據者則非此地又嘗爲王莽官故也
五代

安重霸雲州人初與唐明宗俱事晉王重霸得罪奔
于梁又奔于蜀王建以爲親將王衍立少年宦者王
承休用事重霸深結承休以自託梁末蜀取李茂貞

秦成階三州重霸勸承休求鎮秦州衍以承休爲節
度使重霸爲其副使重霸與承休多取秦川花木獻
衍請衍東遊唐伐蜀承休大恐重霸曰劍門天下之
險雖有精兵不可過也然公受國恩聞難不可不赴
願與公俱西承休素親信之以爲然承休整軍將發
秦人送之帳飲城外酒罷承休上道重霸立承休馬
前辭曰秦隴不可失願留爲公守承休業已上道無
如之何唐軍已破蜀重霸亦以秦成階三州降唐
王環真定人以勇力事孟知祥爲御者及知祥僭號

于蜀使典衛兵晉開運之亂秦鳳階成入于蜀孟昶以環為鳳州節度使周世宗遣將攻秦鳳州數為環所敗昶遣兵出堂倉抵黃花谷以爭糧道周師設伏盡燬之昶遣其秦州節度使高處儔以兵援環未至聞堂倉兵敗亦潰歸處儔判官趙玘閉城不納處儔遂奔成都玘乃以城降成階二州相繼亦降獨環堅守百餘日然後克之

環頗忠於所事因其託身非主不得不抑置於斯然錄此者亦以見玘與處儔之可笑也又有韓繼勳及趙季胤尤庸懦無能觀史舊文似未嘗至此今入叢談

宋

歐陽迴華陽人少事王行為中書舍人後唐同光中蜀平隨行至洛陽補秦州從事孟知祥鎮成都迴復入蜀知祥僭號以為中書舍人拜門下侍郎兼戶部尚書平章事歸朝為左散騎常侍迴性坦率無檢操雅善長笛太祖常召於偏殿令奏數曲御史中丞劉溫叟聞之叩殿門求見諫曰禁署之職典司誥命不可作伶人之事上曰朕嘗聞孟昶君臣溺於聲樂迴為宰司尚習此伎故為我所擒所以名迴欲驗言者之不誣也自是不復召

姦臣

漢

上官桀隴西上邽人少時爲羽林期門郎從武帝上甘泉天大風車不得行解蓋授桀桀奉蓋雖風常屬車雨下蓋輒御上竒其材力遷未央廡令上嘗體不安及愈見馬馬多瘦上大怒令以我不復見馬耶欲下吏桀頓首曰臣聞聖體不安日夜憂懼意誠不在馬言未卒泣數行下上以爲忠由是親近爲侍中稍遷至太僕武帝疾病以霍光爲大將軍桀爲左將軍

皆受遺詔輔少主初桀子安取霍光女結婚相親光每休沐出桀常代光入決事昭帝始立年八歲帝姊鄂邑蓋長公主居禁中共養帝蓋主私近子客河間丁外人時上官安有女卽霍光外孫安欲因光內之爲后光以其尙幼不聽安素與丁外人善說外人曰安子容貌端正誠因長主時得入爲后以臣父子在朝而有椒房之重足下何憂不封侯乎外人喜言於長主召安女入爲婕妤月餘遂立爲皇后年甫六歲安以后父封桑樂侯遷車騎將軍日以驕淫受賜殿

中出對賓客言與我婿飲大樂見其服飾使人歸欲自燒物安醉則裸行內與後母及父諸良人侍御皆亂子病死仰而罵天數守大將軍爲丁外人求封幸依國家故事以列侯尚公主者光不許桀爲外人求光祿大夫欲令得名見又不許長主大以是怨光桀安寢恚知燕王旦帝兄不得立亦怨望迺謀令長公王置酒請光伏兵格殺之誘徵燕王至而誅之因廢帝而立桀或曰當如皇后何安曰逐麋之狗尚顧兔耶且用皇后爲尊一旦人主意有所移雖欲爲家人

亦不可得此百世之一時也事發覺盡誅桀安外人等宗族燕王蓋主皆自殺皇后以年少不與謀亦光外孫故得不廢光欲皇后擅寵有子帝時體不安左右及醫皆阿意言宜禁內雖宮人使令皆爲窮袴多其帶後宮莫有進者皇后立十歲而昭帝崩后年十四五云宣帝卽位尊爲太皇太后凡立四十七年年五十二建昭二年崩合葬平陵

董卓字仲穎隴西臨洮人性麤猛膂力過人桓帝末以六郡良家子爲羽林郎從中郎將張奐爲軍司馬

共擊漢陽叛羌破之拜郎中賜縑九千匹卓曰爲者則已有者則士乃悉分與吏兵無所留中平元年先零羌及河關羣盜反劫致金城人邊章韓遂爲首明年韓遂殺邊章擁衆十餘萬進圍隴西太守李相如反與連和共殺涼州刺史耿鄙而鄙司馬扶風馬騰亦擁兵叛又漢陽王國自號合衆將軍皆與韓遂合乃拜卓前將軍與左將軍皇甫嵩擊破之韓遂等復共廢王國而劫故信都令漢陽閻忠使督統諸部忠恥爲衆所脅感恚病死遂等稍爭權利相殺害其諸

部曲並各垂分卓以誅闖宦爲名將兵入朝遂擅廢
立劫遷都專權縱恣爲呂布所殺其校尉李傕郭汜
等求救不得聞長安中議欲盡誅涼州人乃復攻圍
長安劫得官職並擅權興平元年馬騰從隴右來朝
私有求於傕不獲而怒遂與侍中馬宇前涼州刺史
种邵等合兵攻傕韓遂聞之乃率衆來復與騰合傕
使郭汜等擊敗之种邵死遂騰走還涼州乃更相爭
戰下隴據關中時曹操方事河北慮其乖間爲亂乃
拜騰征南將軍遂征西將軍復徵馬騰爲衛尉封槐

里侯騰乃應名而留子超領其部曲十六年超與韓
遂舉關中背曹操操擊破之遂超敗走騰坐夷三族
超攻殺涼州刺史韋康復據隴右十九年天水人楊
阜破超超奔漢中降於蜀主韓遂走金城羗中爲其
帳下所殺涼州悉平

按董卓臨洮人用兵此地原非
專官何爲錄則以彼時叛者多

在其傳稍撮纂之故
繁畧不繫於卓也

唐

高駢字千里南平郡王崇文孫也家世禁衛幼頗修
飭折節爲文學與諸儒交硜硜譚治道兩軍中更稱

直隸秦州新志 卷之三
譽之事朱叔明爲司馬有二雕並飛駢曰我且貴當
中之一發貫二鵬焉衆大驚號落鵬侍御後歷右神
策軍都虞侯党項叛率禁兵萬人戍長武駢數用奇
殺獲甚多懿宗嘉之徙屯秦州卽拜刺史兼防禦使
取河渭二州略定鳳林關降虜萬餘人咸通中拜安
南都護克復安南又平南詔節度西川用刑殘忍歷
荆南鎮海淮南諸節度傳檄召天下兵共討黃巢威
震一時天子倚以爲重廣明初巢詐降駢欲專已功
奏班師巢復絕駢駢欲縱賊以聳朝廷然後立功託

疾不出巢遂陷西京天子遣使者促駢討賊駢終無
出兵意天下益殆乃以他將代之封駢渤海郡王駢
失兵柄攘袂大詬上書謾言當此時王室微不絕如
帶駢幸國顛沛大料兵陰圖割據一旦失勢故肆爲
醜悖偃然無所顧忌又請帝幸江淮會賊平駢聞縮
氣乃篤意求神仙不視事軍中亂爲其下所囚有突
入擊駢者曳廷下數之曰公負天子恩陷人塗炭罪
多矣尚何云駢未暇荅仰首如有所伺卽斬之裹以
故氈與子弟七人一坎而瘞

宋

曾布字子宣南豐人年十三而孤學於兄鞏同登第以韓維王安石薦上書言爲政之本大率皆安石指也神宗召見論建合意授太子中允凡三日五受敕告與呂惠卿共創青苗助役保甲農田之法韓琦上疏極論新法之害神宗頗悟布遂爲安石條析而駁之持之愈固出歷諸州進直學士知秦州元豐末遷戶部尚書司馬光爲政論令增損役法布不肯章惇爲相布草制極其稱美布贊惇紹述甚力遂興大獄陷正人布多陰擠之後爲相與蔡京有隙屢貶卒

酷吏

漢

田廣明字子公鄭人也爲天水司馬以殺伐爲治遷
淮陽太守故城父令公孫勇與客胡倩等謀反倩詐
稱光祿大夫從車騎數十言使督盜賊止陳畱傳舍
廣明覺知發丘捕斬焉而公孫勇衣繡衣乘駟馬車
至圍圍使小史侍之亦知其非是守尉魏不害與廐
齋夫江德尉史蘇昌共收捕之上以廣明連禽大姦
徵入爲大鴻臚擢廣明兄雲中代爲淮陽太守後出

爲左馮翊治有能名封昌水侯將兵繫匈奴至受降
城受降都尉前死喪柩在堂廣明名其寡妻與姦引
軍空還下吏自殺兄雲中亦敢誅殺坐事棄市
樊奕字仲華南陽新野人與光武少游舊隗囂滅後
隴右不安拜爲天水太守政嚴猛好申韓法善惡立
斷人有犯其禁者率不生出獄吏人及羌胡畏之道
不拾遺行旅至夜聚衣裝道旁曰以付樊公視事十
四年卒官永平中明帝思其在天水時政能以爲後
人莫之及詔賜家錢百萬子融好黃老不肯爲吏

晉

張輔字世偉南陽西鄂人漢河間相衡之後也初爲
藍田令不爲豪強所屈時强弩將軍龐宗及護軍趙
浚僮僕放縱輔繩之殺其二奴轉山陽令太尉陳準
家僮亦暴橫輔復擊殺之累遷御史中丞多所糾劾
後爲馮翊太守是時長沙王又以河間王顒專制關
中不臣之跡言於惠帝密詔雍州刺史劉沈秦州
刺史皇甫重使討顒於是沈等與顒戰於長安輔遂
將兵救顒沈等敗績顒德之乃以輔代重爲秦州刺

史當赴顛之難金城太守游楷亦皆有功轉梁州刺史不之官楷聞輔之還不時迎輔陰圖之又殺天水太守封尚欲揚威西土召隴西太守韓稚會議未決稚子朴有武幹斬異議者即收兵伐輔輔與稚戰於遮多谷口輔軍敗績爲天水故帳下督富整所殺初輔嘗著論以爲管仲不如鮑叔知所奉知所投班固不如司馬遷之辭約而事舉又論魏武帝不及劉備樂毅滅於諸葛亮云

按輔黨逆害正因得刺州乃小人之尤者雖酷烈未著觀其策以殺伐立威則作令時之初心即此耳至於陰圖召舉以自頌其身非欲殺之一念階之厲哉

元魏

元暹字叔照莊帝初除南兗州刺史在州猛暴多所殺害遷秦州刺史先時秦州城人屢爲反覆暹盡誅之存者十一二後爲涼州刺史貪暴無極欲規府人及商賈富人財物詐一臺符誑諸豪等云欲加賞一時屠戮所有資財生口悉沒自入

元麗字寶掌位光祿勳時秦州屠名王法智推州主簿呂苟兒爲主號建明元年置立百官攻逼州郡詔麗爲都督秦州刺史討之苟兒率衆十餘萬屯孤山

圍逼州城麗出擊大破之苟兒率其王公三十餘人詣麗請罪麗因平賊之勢枉掠良善七百餘人世宗不問進雍州刺史爲政嚴酷吏人患之遷冀州入爲左僕射帝曰聞公在州殺戮枉濫又大殺道人對曰臣在冀州可殺道人二百許人亦復何多帝曰一物不得其所若納諸隍况殺道人二百而言不多麗脫冠謝而已

元修義字壽安涉獵書傳頗有文才自元士遷齊州刺史爲政寬和不殺一人轉秦州刺史在州多受納

累遷吏部尚書唯事貨賄授官大小皆有定價後二

秦反假修義西道行臺行秦州事爲諸軍節度修義

性好酒每飲連日神明昏喪竟無部分之益

按此亦昏庸貪

墨者耳何以附於酷吏夫酷有不貪貪則未有不酷者今觀元修義然則寬和亦濟貪之術歟

元琛字曇寶幼而敏慧初拜定州刺史多所受納及

還朝靈太后曰琛在定州惟不將中山宮來自餘無

所不致何可復用遂廢之琛資緣得出爲秦州刺史

在州聚斂百姓嗟吁屬氏反詔琛爲行臺還攝州事

琛性貪暴求欲無厭百姓患害有甚狼虎討氏被破

士卒死者數千率衆走還焉耳

薛巒河東汾陰人祖安都以功賜爵河東公子道標襲爵爲秦州刺史十三年卒弟道次亦封安邑侯出爲秦州刺史巒其子也襲爵降爲平溫子初爲秦州刺史帶隴西太守後爲滎陽太守肆州刺史所在貪穢在州彌甚納賄於司空劉騰以求美官未得而騰死正光五年莫折念生反於秦州肅宗以巒爲西道別將討之進及平涼郡東與賊交戰不利遂退還後復爲汧城大都督鎮北隴

趙叔隆天水人趙逸之後初同懸瓠城民白早生之逆鎮南邢巒平豫州獲而宥之以貨自通得爲秦州西府長史與敕使元修義同心聚斂納貨巨萬賂司空劉騰出爲中山內史在郡專以貨賄爲事又姦詐無行懸瓠之免是其族人前軍將軍趙文相之力後無報德之意更與文相斷絕文相爲汝南內史猶經紀其家後文相卒叔隆了不恤其子弟人賤薄之于洛侯代人也以勞舊爲秦州刺史而貪酷安忍州人富熾奪民呂勝脛纏一具洛侯輒鞭富熾一百截

其右腕百姓王隴客刺殺民王羗奴王愈二人依律
罪死而已洛侯生拔隴客舌刺其本并刺胷腹二十
餘瘡隴客不堪苦痛隨刀戰動乃立四柱磔其手足
命將絕始斬其首支解四體分懸道路見之者無不
傷楚闔州驚震有司料劾詔於刑人處宣斬洛侯
李洪之恒農人少爲沙門晚乃還俗以假託外戚出
爲使持節秦益二州刺史至治設禁奸之制有帶刀
行者罪與劫同輕重品格各有條章於是大響州中
豪傑長老示之法制乃夜密遣騎分部覆諸要路有
犯禁者輒捉送州宣告斬決其中枉見殺者百數初
洪之微時妻張氏助其經營多所補益有男女幾十
人後得劉芳從妹而疎薄張氏爲兩宅別居二妻妒
競互相訟詛兩宅母子往來如讎及莅西州以劉自
隨洪之素非廉清每多受納有司奏洪之受贓狼籍
又以酷暴遂鑊洪之赴京隨賜死洪之志性多所堪
忍疹疾灸療艾炷圍將二寸首足十餘處一時俱下
而言笑自若接賓不輟及臨自盡防卒扶持將出却
入遍繞家庭如是再三泣艱良久及臥而引藥

羊祉字靈祐太山鉅平人晉太僕卿琇之六世孫也
父規之宋任城令世祖南討至鄒山規之降賜爵鉅
平子祉性剛愎好刑名襲鉅平子爵坐侵盜公資私
營居宅抵死恕而遠徙後還持節爲梁州軍司討叛
氏隨爲秦梁二州刺史天性酷忍又不清潔以掠人
爲奴婢爲中尉王顯所彈免後復起爲平北將軍未
拜而死祉自當官不憚疆禦朝廷以爲剛斷時有檢
覆每令出使所經之處人號天狗及出將臨州並無
恩潤兵民患其嚴虐焉

唐

王鉷中書舍人璿側出子也初爲鄆尉遷監察御史
數按獄深文元宗以爲才拜京畿關內採訪黜陟使
李林甫以鉷險刻可動以利故倚之使驚擊狼噬鉷
所摧陷多抵不道又厚誅斂嚮天子意人雖被蠲貸
鉷更奏取脚直轉異貨百姓間關輸送乃倍所賦又
取諸郡高戶爲租庸腳士大抵貲業皆破督責連年
人不賴生鉷歲進錢鉅億萬以爲歲租外物供天子
私帑帝以鉷有富國術加隴右羣牧度支營田等使

後以罪賜死諸子悉誅有司籍第舍數日不能徧至以寶鈿爲井幹引泉激雷號自雨亭其奢侈類此官不

專秦然既察諸郡又監羣牧則此地之被其荼毒者多矣

宋

蘇曉武功人爲轉運使權茶規其利歲入百餘萬緡開寶間李守信來秦隴市木盜官錢事發自殺太祖命曉案之逮捕甚衆右拾遺通判秦州馬適妻李卽守信息女守信嘗用木爲筏以遺適曉得守信所送書以進太祖將捨之曉上章固請寘于法仍籍其家

餘所連及者多至破產盡得所隱沒官錢擢判大理寺監在京商稅曉深文少恩當時號爲酷吏及卒無子有一女甚鍾愛亦先曉卒人以爲深刻所致

韓縝字玉汝以天章閣待制知秦州嘗宴客夜歸指使傅勅被酒誤墮入州宅與侍妾遇縝怒令軍校以鐵裹杖箠殺之勅妻持血衣搗登聞鼓以訴坐落職分司南京秦人語曰寧逢乳虎莫逢玉汝其暴酷如此

佞幸

漢

張放其先杜陵人湯之五世孫也父臨尚敬武公主
 卒放少嗣高祖安世富平侯爵鴻嘉中成帝與近臣
 游宴放以公王子開敏得幸為侍中寵愛殊絕常從
 為微行鬪雞走馬長安中積數年上諸舅皆害其寵
 白太后太后以上春秋富動作不節甚以過放時數
 有災異議者歸咎放等於是左遷放北地都尉數月
 復徵入太后以為言出放為天水屬國都尉永始元

延間比年日蝕故久不還放璽書勞問不絕上雖愛放然上迫太后下用大臣故常涕泣而遣之成帝崩放思慕哭泣而死

孟佗扶風人資產饒贍桓帝時中常侍張讓與曹節王甫等相爲表裏讓有監奴典任家事佗與奴朋結傾竭饋問無所遺愛奴感德之問佗曰君何所欲力能辦也曰吾望汝曹爲我一拜耳時賓客求謁讓者車恒數百千兩佗後至不得進監奴乃率諸蒼頭迎拜於路遂共舉車入門賓客咸驚謂佗善於讓爭以

珍玩賂之佗分以遺讓讓大喜遂以佗爲涼州刺史

或曰此事亦跡地可喜乃以之入佗幸何也且佗幸者前史所定固無此人也曰君不思佗幸之義耶夫以佗而得幸於天子猶謂之佗幸况佗於閭宦之奴者乎然則以附佗幸抑猶幸矣

後漢

魏志

孔桂字叔林天水人建安初數爲將軍楊秋使詣曹操操表拜騎都尉桂性便辟曉博奕踰鞠故操愛之每在左右出入隨從桂察操意喜樂之時因言次曲有所陳事多見從數得賞賜人多饋遺桂由此侯服玉食操既愛桂五官將及諸侯亦皆親之其後桂見

直隸秦州新志 卷之三 五
操久不立太子而有意於臨菑侯因更親附臨菑侯
而簡於五官將將甚銜之及操薨丕即王位未及致
其罪黃初元年隨例轉拜駙馬都尉而桂私受西域
貨賂許爲人事事發詔收殺之

志凡操名皆稱
太祖餘仍其舊

晉後
秦

姜紀天水人呂氏之叛臣阿諂奸詐好間人之親戚
姚興子弼有寵於興紀遂傾心附之弼時爲雍州刺
史鎮安定與密謀還朝令傾心事常山公顯樹黨左
右至後興以弼爲尚書令侍中大將軍旣居將相虛

襟引納收結朝士勢傾東宮遂有奪嫡之謀矣

元魏

王襲字元孫年十四以父獻任擢爲中散仍總中部
獻薨高祖詔襲代領都曹爲尚書令文明太后曰襲
年少智思未周其都曹尚書令可權記使閑習政事
後用不晚終太后世寵念如初及后崩襲仍在高祖
在右然禮遇稍薄出爲秦州刺史又轉并州十七年
輿駕詣洛路幸其治供帳粗辦境內清靜帝頗嘉之
而民庶多爲立銘置于大路虛相稱美或曰襲所教

也帝聞而問之對不以實因面被責讓降號二等

隋

邱和洛陽人仕周開府儀同三司入隋封郡公歷資
梁蒲三州刺史漢王諒反襲取蒲州和走免廢為民
宇文述有寵和傾心附納俄以發武陵公元冑罪復
拜代州刺史煬帝北巡和饋獻精腆至朔州而刺史
楊廓無所進帝不悅述甚稱和美進博陵太守詔廓
就視和為式帝過博陵和上食加豐愈喜由是所過
競為珍侈獻自和發也然和善撫吏士得其心遷天

水郡守大業末又以裴矩薦拜交阯太守林邑西諸
國數遣和明珠文犀金寶故和富埒王者隋亡遂附
蕭銑銑平又歸唐封國公除特進卒年八十六贈謚
陪葬有子十五人多至大官

唐

紀處訥者秦州上邽人為入魁岸髭長數尺其妻武
三思婦之姊縱使通三思繇是欵昵進為太府卿神
龍元年夏大旱穀價騰涌中宗召問所以救人者三
思知之陰諷太史迦葉志忠奏是夜攝提入太微近

帝坐此天子與大臣接有納忠之符帝信之下詔褒
美賜處訥衣一副綵六十段與宗楚客並同三品進
侍中後伏誅

宋

錢明逸字子飛吳越王俶之後爲呂夷簡所知擢右
正言首劾范仲淹富弼更張綱紀紛擾國經凡所推
薦多挾朋黨乞早罷免使姦詐不敢效尤忠實得以
自立疏奏二人皆罷其父杜衍亦免相明逸蓋希章
得象陳執中意也加史館脩撰知開封府妄人冷青

自稱皇子捕至府明逸方正坐青叱曰明逸安得不
起明逸爲起坐尹京無威望又獄吏榜婦人鄴氏墮
足死後出爲軍州加端明殿學士知秦州先是于闐
入貢道邈川峭廝羅有子質于秦別子木征居河州
殿侍程從簡私與之盟令過洮河許以官且歸其質
子事不驗木征怒留貢使明逸械從簡往詰因斬之
木征惶懼悉遣所留者治平初復爲翰林學士御史
論其傾險儉薄頃附賈昌朝夏竦以陷正入文辭淺
繆豈應昌居翰苑乃罷之

宦豎

魏

苻承祖略陽氏人也因事爲閹人爲文明太后所寵
自御廄令遷中部給事中散騎常侍輔國將軍賜爵
略陽侯兼典選部事轉吏部尚書高祖爲造甲第數
臨幸之進爵略陽公初太后以承祖居腹心之任許
以不死之詔後坐賊應死高祖原之削職禁錮在家
授悖義將軍佞濁子

北齊

穆提婆本姓駱漢陽人也父超以謀叛誅母陸令萱嘗配入掖庭後主襁褓之中令其鞠養謂之乾阿奴遂大爲胡后所昵愛令萱奸巧多機辯取媚百端官掖之中獨擅威福天統初奏引提婆入侍後王朝夕左右大被親狎嬉戲醜褻無所不爲寵遇彌隆官爵不知紀極遂至錄尚書事封城陽王令萱又媚穆昭儀養之爲母是以提婆改姓穆氏及穆后立令萱號曰太姬母子勢傾內外矣殺生予奪不可盡言晉州軍敗後主還鄴提婆奔投周軍令萱自殺子孫大小

皆棄市籍沒其家

唐

楊復恭本林氏子宦父元翼咸通中領樞密世爲權家復恭定策立昭宗攘取朝政頗橫恣王瓌者惠安太后弟求節度使復恭沮之瓌聞怒甚遂居中任事復恭不欲分己權白爲黔南節度使道興元而兄子守亮方領節度陰勒利州刺史覆瓌舟于江宗屬賓客皆死以舟自敗聞帝知之詔衛兵攻復恭治殺使者罪復恭奔興元於是鳳翔李茂貞華州韓建邠州

王行瑜同州王行約秦州李茂莊同劾守亮納叛臣
請出兵討罪復恭爲韓建邏士所殺

茂莊時爲秦州招討故錄

五代

王承休不知何所人事蜀王衍爲宣徽使以少年得
幸安重霸附之教其求外乃出爲秦州節度使命曰
天雄軍承休在軍無所獻爲惟求致珍異以媚於衍
衍與承休妻嚴氏通久而思之將幸秦承休復謂衍
曰秦州多出國色密領取秦州子女教以歌舞伎樂
令畫工圖真及錄名氏以獻衍遂決意幸秦州羣臣

諫不聽已行至綿谷聞唐兵入境而還副使安重霸
因給承休赴難承休中其計遂奔蜀而行已亡

宋

藍繼宗字承祖南海人事劉鋹爲宦者歸朝年十二
遷爲中黃門傳詔多稱旨秦州並邊有大小洛門砦
自唐末陷西羌雍熙中溫仲舒諭酋豪使獻其地徙
衆渭北言者以爲生事請罷仲舒太宗遣繼宗往按
視還奏二砦據要害產良木不可棄帝悅復使繼宗
勞賜仲舒

李憲字子範祥符人皇祐中補入內黃門數論邊事
合旨王韶請復河湟命憲往視師與韶進收河州爲
熙河經略安撫司幹當公事還爲內侍省押班乘驛
計議秦鳳熙河邊事諸將皆聽節度元豐中領熙秦
軍復蘭州進景福殿使復還熙河仍兼秦鳳軍馬
李舜舉字公輔開封人世爲內侍出爲秦鳳路走馬
承受以文思院使領文州刺史帶御器械
李繼和開封人以父任爲內侍黃門時沙苑闕馬詔
秦州置塲以券市之繼和領職不數月得馬千數而
人不擾握帶御器械文州團練使

閻文應開封人給事掖庭積遷至入內副都知呂夷
簡與文應相結使爲中訶因共謀廢郭后仁宗復悔
有復后之意文應大懼會后有小疾挾太醫診視數
日乃言后暴崩竇文應爲之也諫官劾其罪議并其
子士良出之以文應領嘉州防禦使爲秦州鈐轄
童貫少出李憲之門性巧媚善策人王徽指與蔡京
游京進貫力也京旣相贊策取青唐以貫監王厚軍
復四州遂爲熙河蘭湟秦鳳路經略安撫制置使更

歷九鎮進太傅涇國公公人稱蔡京爲公相因稱貫
爲媼相將秦晉銳師深入河隴



